

**Date – 22/03/2024**

**Time - 18:30 -18:40Hrs**

## **REGIONAL NEWS BULLETIN**

### **HEADLINES (EVENING)**

1. MNF Party chuan Lok Sabha inthlana an candidate atan Rajya Sabha member ni lai Pu K. Vanlalvena an ruat.
2. Khawvel pum huap tui pawimawhna leh ngaihhlut a tul zia te, ren a tul zia te inhrilh tharna ni, World Water Day chu PHE Dept buatsaihin vawiin khan Mizoram pumah hman a ni.
3. India leh Bhutan chuan vawiin khan thawhdunna tura inremna thuthlung chi hrang hrang an ziak.
4. UN General Assembly chuan khawl thluak tha mi Artificial Intelligence chungchanga resolution hmasa ber nimin khan an pawm



### **MNF LOK SABHA CANDIDATE**

MNF Party chuan Lok Sabha inthlana an candidate atan Rajya Sabha member ni lai Pu K. Vanlalvena an ruat.

MP Candidate tur hi vawiin khan MNF Hnam Runah Party President Pu Zoramthanga'n a puang a ni.

Pu K. Vanlalvena hi kum 2020 June thlaah Mizoram-in Rajya Sabha-a seat a neih chhun MP atan thlan tlin a ni a. Rajya Sabha MP a nih tan atanga kum thum leh a chanve chungin Parliament Session-ah vawi 15 thu a sawi tawh a. Chung zinga vawi 13 chu Chairman remtihain a sawi a, vawi 2 dangte erawh Chairman-in a phal lo chungin Manipura Zo hnahthlakte thlang hauhna thu a auchhuahpui a ni. Parliament Session-ah zawhna puitling vawi 22 leh zawhna tenau vawi 40 vel a zawt tawh a ni.

Candidate puanna ah MNF President Pu Zoramthanga chuan Lok Sabha MP candidate chu Mizoram mipui aiawhtu leh thil tha tam tak titu a ni a ti a, Opposition atanga MP inthlan hmachhawn a huphurhawm tih sawiin theihtawp an chhuah dawn a ti bawk.

Pu Zoramthanga chuan NDA chu political party hrang hrang thutkhawmna mai a ni a ti a, hnam himna nghawng thei thilah Central NDA Sorkar do zawngin an kal zel tih sawiin CAA, FMR, Assam-Mizoram ramri leh Manipur unaute buainaah an dinna an la sawhsawn ngai lo tih sawiin NDA do na ngam ber chu MNF Party an ni a ti.

Puan tawh angin Mizoram Pradesh Congress Committee chuan kumin Lok Sabha inthlanpui lo awm turah an party candidate atan Pu Lalbiakzama an ruat a. Rorel lai ZPM chuan Richard Vanlalmangaiha an ruat a, PC Party-in Pi Rita Malsawmi ruatin Pu Lalhriatrenga Chhangte chu independent in a ding dawn a. BJP erawh central lamin an puang dawn niin state-a an thuneituten an sawi.

**(CORR)**



## **GOVERNOR**

Governor Dr Hari Babu Kambhampati chuan vawiin khan Foundation day of Bihar (Bihar Diwas) chu Durbar Hall, Raj Bhavan-ah a hmanpui.

He hunah hian Governor chuan 'Bihar Diwas' hman theih a ni chu lawmawm a tih thu a sawi a. He hun hi Bihar state, Bengal Presidency nen a March 22, 1912-a then hran lawmna anih thu sawiin Bihar chu 1947-a India-in independence a neih hnu pawn Republic of India hnuai a awm chhonzawm zel thu a sawi. Bihar chu hemi hnuah hian thang nasain, India economy, culture leh politics-ah te a thawh hlawk thu a sawi a. Nalanda University-te, Buddha zirtirna hmun-Bodh Gaya-te awmna anih avangin India ram tan kum tam tak chung chu sakhuana leh hriatna hmun pawimawh tak anih thu a sawi bawk.

**(DIPR)**



## **WORLD WATER DAY**

Khawvel pum huap tui pawimawhna leh ngaihhlut a tul zia te, ren a tul zia te inhrilh tharna ni, World Water Day chu PHE Dept buatsaihin vawiin khan District hrang hrangah hman a ni.

Aizawlah chuan PHE Department leh Central YMA tangkawpte'n Aizawl Vanapa Hall-ah he Ni pual hian hun an hmang. Kumina thupui hi 'Inrem Nan Tui' tih a ni.

Aizawla World Water day hmanna hi PHE Department Secretary Lalhmingliani Hmar chuan a hmanpui a, tui chu mitin mamawh vek a nih angin, chakkhai atana hmanna chi hrang hrangah, khawvel changkang zelin mamawhna pawh a ti tam ve zel a ti a, tui dukhawp hman tur a awmlo chho tan dawn a a lan avangin a hmanna hrang hrangah inhriatthiamna nen inrem taka awm tlan a ngai tih a sawi.

Kumin World Water Day thupui atan hian 'Inrem nan tui' (Water for Peace) tih chu thlan a ni a. He ni puala intihsiakna hrang hrang lawmman sem niin tuihna humhalh kawnga mimal thawktha mi 4 chawimawina hlan an ni. Mizoram pum huapa WATSAN Committee thawk tha thlanchhuah nghal niin, Mualthum 'N' WATSAN Committee chu titha ber lawmman pek an ni bawk.

Champhaiah chuan I&PR Auditorium-ah 'Khawvel Tui Ni' vawi 33-na pualin inzirtirna hun, 'Inrem Nan Tui' tih thupuaia hmangin hman a ni a; hemi hnu hian tui humhalh leh ren a pawimawh zia inzirtirna kawngzawh CHANEM building atanga Circuit House thleng buatsaih a ni. He hun hi District Bawrhsap Pu James Lalrinchhana, District Water & Sanitation Mission (DWSM) Chairman chuan a hmanpui.

Lawngtlai khawpuiah pawh Lawngtlai WATSAN Division buatsaihin Areopagy, Lawngtlai Bazar-ah he ni pual hian hun hman a ni a. PHED-a mithiamte'n tui pawimawhna leh ren a tul thu te sawiin, Tui leh tui hnar humhalh leh siam belh kawngah department hrang hrang hmalakna inchawm tawn turin sawrkarin ruahmanna a kalpui tih pawh sawiin, tui ren te, tui hna siam tura thing

phun te, tuikhuah siam leh ruahtui khawl te chu tui harsatna pumpelhna atan uar deuh deuh turin kal khawmte an chah a ni.

Kolasib-ah pawh PHE WATSAN Division buatsaihin DC pisa tualah World Water Day pualin hun hman a ni a, DC Pu John LT Sanga'n a hmanpui a. DC chuan mihring thiamna leh theihna sang hle mah se tui erawh chu a siam chhuak thei lo va, tui siam theitu chu Pathian chauh anih avangin tuihna humhalh leh a awmsa ren chu mihringte mawhphurhna a ni, tiin tui-hna siamtu ramngaw leh thing leh mau te humhalh tura theihtawp chhuah turin mi tin a sawm a ni.

Mamit District-a hmanna ah chuan Khuallian DC Pu V.L. Remliana chuan tui pawimawhna leh hlutna chu kan hriat tawh leh hriat sa a ni a ti a, tui pawimawhna hria ram changkang a piangin tui an humhalh a, thangthar naupang zawkte a bikin zirlai kalkhawmte chu tui humhalhna tura tih tur hrang hrangte ngaihven a, tuna kan ram dinhmun chu a lungawithlak tawh loh zia kan hriat thar a, hma kan lak a ngai takzet a ni a ti.

Saitual ah chuan Keifang Zawlbukah hman a ni a, Khuallian Saitual DC Dr Lalngura Tlau chuan thu sawiin tuihna khawlkhawm chu in zirtir thar a tul takzet a ti a, tui hna humhalh vanga hmasawna tam tak kan neih theih thute leh hman ralna leh renchem lamah pawh kan inzirtir a tul takzet a ti bawk.

Khawzawl ah chuan Bawrhsap Pu K. Lalrohluah chuan tui harsatna chuan ram, state, khua leh mimal inkarah inngirhona leh indona a thlen fo thin a ni, a ti a. Ramngaw, lui hnar leh lui dung te vawiin atanga enkawl that an nih loh chuan hun lo la awm zel turah tui harsatna a thleng dawn a ni, a ti bawk.

World Water Day hi United Nations bul tumin kum 1993 atang khan khawvel pumah kum tin March ni 22-ah hman thin a ni a. Tui pawimawhna leh hlutna te, humhalh leh ren a tulzia te au chhuahpuina leh inzirtirna ni atan hman thin a ni.

Mizoram EIACP Hub, Environment Education Programme (EEP) - Mizoram Pollution Control Board (MPCB) leh Govt. Johnson College atangin Eco Club leh Adventure Club-te tangkawp chuan World Water Day 2024 lawm nan Tuikual Lui thian faiin an hnatlang a, zirlai, zirtirtu leh official mi 80 vel zet an thawkchhuak a ni.

**(CORR + PTC's)**

<><><>

## **ZPM LS CANDIDATE FILES NOMINATION**

ZPM Candidate Pu Richard Vanlalmangaiha chuan vawiin khan Lok Sabha member inthlan lo awm turah ZPM ticket-a ding turin a Returning Officer, Aizawl DC Pi Nazuk Kumar-i hnenah a hming a thehlut.

Hming theh luhnaah hian Chief Minister Pu Lalduhoma leh ZPM Party President Pu Lalliansawta ten an tawiawm.

A hming a theh luh zawha chanchinbumite a kawmnaah Pu Richard Vanlalmangaiha chuan MP-a thlan tlin a nih chuan Mizoram hmasawna tur a tam thei ang ber ngaihtuah a tum thu a sawi a. An au hla ber tur chu Mizoram than zel nan ke an pen tur thu a ni dawn tih sawiin sawrkarin a duh anga a kalpui theih a ni dawn, a ti. A khingpui tur te chu mi fel tak an ni hlawm chungin nikum maiah mipuiin Mizoramah sawrkar thar, ZPM sawrkar an thlang chhuak a; mipuiin duh taka an thlan chhuah ZPM Candidate a nih avangin a tlin ngei a inbeisei tih a sawi a. Thlan tlin a nih chuan BJP leh a thawhpui NDA emaw Congress leh a thawhpui INDIA lama thut tur chungchang chu party high command-in a ngaihtuah dawn tih a sawi bawk.

**(CORR)**

<><><>

## **MPCC PRESS CONFERENCE**

Mizoram Pradesh Congress Committee Vice President Pu Lalnunmawia Chuaungo chuan Lok Sabha inthlan lo awm turah BJP khingpui lian ber annih avangin an party chu Central ah beih a tawk nasa tih a sawi.

MPCC Vice President chuan vawiin khan Aizawl Press Club ah thuthar thehdarhtute kawmin Congress chu Indian National Democratic Inclusive Alliance (INDIA) hruaitu leh opposition party lian ber a nih avangin Lok Sabha inthlan lo awm tura BJP kawng daltu lian ber a ni a ti a, kawng hrang hranga beih mek anni tih sawiin Income Tax Department leh Enforcement Directorate diklo taka hmanrua a hmangin Congress Party bank account 11 lai chu an ti tang a, heng Account a Cheng vaibelchhe 210 lai hrensak a nih bakah Congress Party in Bank Account-a pawisa an neih dang te pawh khawihchet theih lohva harsatna siamsak a ni a ti a. Lok Sabha inthlan lo awm tur atana Congress Party inbuatsaihna chu Central-a BJP sawrkar duhthusam ang takin nasa taka tih khaihlak a ni tih a sawi bawk.

Pu Lalnunmawia Chuaungo chuan BJP sawrkar chuan Electoral Bond Scheme hmangin cheng vaibelchhe 8,250 chuang zet pawisa a dawng tawh a a ti a, scheme chu diklo taka hmangin BJP chuan mimal leh company tam tak, Income Tax Department leh Enforcement Directorate te kaltlanga tihluhna hmangin BJP Party tan pawisa an thawh tir thin tih a sawi bawk.

Pu Lalnunmawia Chuaungo chuan The Assam Healing (Prevention of Evil) Practices Bill 2024 hman a nih hunah ramthim a rawngbawltu ten tawngtai a tihdamna rawngbawl an neih thin te hi khap a ni tawh dawn a ti a. an dinhmun a chep hle tih sawiin kumina Lok Sabha inthlan ah BJP a sawrkar leh chuan Kristiante chu an chep belh zel dawn tih a sawi bawk.

**(CORR)**

<><><>

## **ATC VALEDICTORY SERVICE**

Aizawl Theological College chuan vawiin khan zirchhuak mi 65 thlahna hun an hmang.

Vawiina hun hman hi Synod Moderator Rev R. Vanlalnghaka chuan hman puin thlahna thuchah a sawi a, ATC chu hun hmasa lam thlirin nasa takin hma a sawn a ti a, tun dinhmunah ATC ah chuan zir theih hrang hrang a awm tawh tih sawiin hma a sawn belh zel a ti bawk.

Aizawl Theological College zirlai kalchhuak tur zingah hian BD zirlai 28 an awm a, M TH zirlai 32 awmin D TH zirlai 5 an awm bawk a ni.

**(CORR)**

<><><>

## **MADC BUDGET SESSION ENDS**

Mara Autonomous District Council (MADC) budget session ni thum awh chu vawiin khan zawhfel a ni a, kum 2024-25 budget cheng nuai 21736.21 chu lungrual taka pass a ni.

MADC budget Pu M.Laikaw CEM in pharh takah hian salary atan cheng nuai sing 20147.23 awmin Non salaryah cheng nuai sang1172.60 a ni a, VC Salary atan cheng nuai 55.56 awmin VC non salary atan cheng nuai 124.62 dah a ni a, Local Revenue Receipt ah cheng nuai 236.20 dah a ni bawk.

Session chung hian Unstarred question panga chhanna house dawhkan ah chhanna pek a ni a, starred question 33 zingah 28 chhan a ni bawk.

Nimin khan official Official bill pahnih The Mara Autonomous District Council (Marriage and Divorse) Bill 2024 leh The Mara Autonomous District Council (Animal Husbandry and Veterinary Department Group A post) (Recruitment) Rules, 2024 te pass a ni a, Tun tum session ah hian CAG report kum 2016- 2017, 2017-2018 te house ah a pharh bawk a, Village council pahnih-New Siaha East-II leh Lopu-II thiah tak house ah pharh a ni bawk.

**(CZ Hluna PTC Siaha)**

<><><>

## **INDIA AND BHUTAN**

India leh Bhutan chuan vawiin khan thawhdunna tura inremna thuthlung chi hrang hrang an ziak. Inremna ziah lai hian Prime Minister Narendra Modi leh Bhutan PM Tshering Tobgay te pawh an awm a ni.

Prime Minister Narendra Modia hian vawiin khan Bhutan hi a thleng a. Bhutan a cham chhungin Bhutan lal Kigme Khesar Namgyel Wangchuk a hmu ang a. Hei bakah hian Bhutan PM Tshering Tobgay nen an inkawm bawk ang.

Union Ministry of External Affairs chuan tun tuma PM Modia Bhutan tlawh hi tihdan phung pangngaia India leh Bhutan inkara inbiakna neih thin ang kha a ni a. Sawrkarin thenawm ram ngaih pawimawh hmasak policy a kalpui mek tihhlawhtlinna a ni bawk. India leh Bhutan inlaichinna hi inrintawanna atanga indin niin hun rei tak ngeth taka lo kalpui tawh anih thu MEA chuan a tarlang bawk a ni.

(Newsonair)

<><><>

## **AAP**

Aam AAdmi Party hruaitu leh Delhi Chief Minister Arvind Khejriwal-a man anih dan chu Supreme Court-a a khinna chu a hnukkir. Pu Khejriwal-a hian court hniam zawk atangin Liqour policy scam-a man anihna hi a khing dawn a.

Hemi hma lawk hian he thubuaia man ve tho BRS hruaitu K Kavitha in a khinna chu Supreme Court chuan alo hnawl sak a. Kar hmasa khan S Kavitha hi man a ni a. Kavitha-i khinna ngaihtuahtu bench tho hi Arvind Khejriwal-a khinna ngaihtuah tura tih a ni.

Hetihlai hian AAP chuan BJP headqarters ah lungawilohna lantir a ni. .

(Newsonair)

<><><>

## **UN ON AI**

UN General Assembly chuan khawl thluak tha mi Artificial Intelligence chungchanga resolution hmasa ber nimin khan an pawm. He resolution-a tarlan dan chuan AI avanga ram tinin hlawkna an chhar theih nante, mihring dikna chanvo zahsak leh him, hlauhawm loh leh rintlaka AI hman an duh thu tarlan a ni a. He resolution hi US putluh niin ram 123 chuangin an pui a. Vote lak ngai loin member ram zawng zawng 193 in an thlawp a ni.

He resolution atan hian US chuan ram 120 chuang thawhpuiin a thu kalhmang tur hi an buatsaih a. Heng ram zingah hian Russia, China leh Cuba te pawh an tel a ni.

(Newsonair)

<><><>